

In misteri da 1500 onns a Trin

Avon duas jamnas eran dus buobs dad otag onns a Trin vidlunder da baghegiar lur plaz da survesta ella scarpa sper casa. In d'els aveva tuttenina enta maun in ies d'ina queissa. Spert eis ei semussau ch'igl ei d'ina persuna. Il Survetsch archeologic dil Grischun ha confirmau ch'ìls dus affons ein fruntai sin ina fossa da 1000 tochen 1500 onns.

AUGUSTIN BEELI/FMR

«Gie, igl ei in veramein in misteri. Quei areal era absolutamein buca enconuschents sco zona da scavaziuns», declara Christoph Walser sin damonda dalla FMR. Il collaboratur dil Survetsch archeologic dil Grischun conferma la scuvierta misteriusa che dus buobs da Trin han fatg. Walser meina la partiziun dalla perscrutaziun dil terren ed ei staus ina dallas persunas ch'ei stada informada gl'emprem dall'anflada. L'entschatta mars ein ils dus amigats dad otag onns, Yann Hatz e Nico Candrian, fruntai sin ossa. Il vischin haveva lubiu ad els da cavar in pign plaz da survesta ella scarpa dalla via da quater. Igl ei in territori spundiv che la vischnaunca ha aviert avon zacons onns culla via da quater.

In skelet cumplet

L'anflada nunspigada ha envidau il fiug d'aventuras dils giuvens exploraturs. Sonja Hatz-Kobelt, la mumma da Yann, conferma sin damonda dalla FMR: «Strusch ch'els han anflau gl'emprem ies ein daplirs vegni alla surfatscha. Per esser segirs havein nus contactau il guardiaselvachina. Lez ha manegiav ch'ei seigi in cass dubius, nus dueigien telefonar alla polizia.» Enstagl ha Sonja Hatz telefonau ad ina enconuschenta dil Survetsch archeologic dil Grischun. Suentent engins telefons ha ella purtau l'ossa agli uffeci a Cuera. Leu eis ei stau spert clar ch'igl ei ossa d'in carstagnu e ch'ìls buobs da Trin ein fruntai sin in skelet d'ina persuna.

Sin quei ein ils specialist vegni sil plaz. «Nus havein constarau che quell'ossa s'aua tier ina fossa ch'ìns ha fatg apostu cun in mir da crappa.» L'emprema inspeccziun ha dau als archeologs indecis ch'ei seigi ina fossa d'ina sepultura dil temps medieval tumpriv, pia dils onns 500-1000 onns s. Cr. «Il tip da fossa, la construcziun e co la bara schischeva per quei temps», gi Christoph Walser el discuors culla FMR.

Destruir mo la detta-pei

La mumma digl «exploratur» Yann raquenta ch'ei seigi stau impressiunont da veser co in ies suenter l'auter seschevi cumbinar cun l'auter, la butschida, la scadiola dil calun che eri aunc egl ies dalla queissa, la spina dorsala era cumpletta, ils spinals, las spatlas, tut mavi in en



Il liug dall'anflada, ella scarpa sur il quartier Sursch/Cresta.

FOTO AUGUSTIN BEELI

l'auter tochen tier la cavazza, ossa da mauns e peis. La habitonta dil quartier Sursch/Cresta menziuna entatgei special en connex culs peis dalla bara anflada: «La scarpa s'aua al vischin ed a nus. Cu nus havein schau baghegiar in parcadi leu, ha la pala digl excavatur tagliav exact la detta-pei dil skelet – mo buca dapli.» La maschina havev saviu destruir l'entira fossa. La casualitad ha denton vulliu ch'ella schanegi il liug da sepultura d'ina persuna morta avon 1000 tochen 1500 onns.

Culla metoda radiocarbonica C14 san ins datar material organic, aschia era ossa, e quei bunamein exact sigl onn dall'entschatta dalla decumposiziun. Christoph Walser suppona che la scarpa cuntegni aunc ulteriuras fossas. Dalla vart ch'ei ussa parcadi ei dil remiment negina ossa vegnida neunavon. Ei para che la retscha da nischas entschევess gest nua che gl'emprem skelet schischeva. Lez ha gl'uffeci priu a Cuera per inventarisar e documentar.

Il fiug dils exploraturs

El quater ed en scola ei la novitad sederasada. Auters camerats han entschiet a cavar tscheu e leu, cul medem fiug d'exploraturs sco

Yann e Nico. Sch'il cantun vegn ussa a dar l'ossa a Basilea egl Institut intercantun per schar eruir culla metoda C14 la data da mort dalla persuna ei buca segir. Igl ei ina metoda cara e gl'uffeci spargnus cun decider talas expertisas. «Finamira da minga anflada eis ei da proteger il liug», declara il menader da partiziun dil Survetsch archeologic dil Grischun. Christoph Walser gi ch'il meglier seigi sche anfladas supponidas restien ella tiara schi gitg che mesiras da baghegiar sforzien buca da far ulteriuras scavaziuns.

«Ìls buobs ein schon stai fetg trumpai ch'igl archeolog ha buca cavau vinavon», conceda Sonja Hatz. Quei che ha fatg plascher alla dunna ei ch'igl archeolog ha integrau ils affons ellas lavurs da salvar il skelet, da mesirar e documentar quel ed il liug. «Ìls buobs han astgau gidar da mesirar la fossa e registrar las coordinatas. In tierz camerat ei schizun vegniu cul penel da cuschina per prender ord la tiara precautamein l'ossa», raquenta Sonja Hatz alla FMR. L'entira famiglia ei dil remiment interessada alla historia dil temps medieval tumpriv a Trin. La historia paleisa denton per bia buca tut ses misteris.

Objects anflai s'audan al cantun

Loghens d'archeologia ein suttamesa alla lescha cantunala davart la proteccziun dalla natira e dalla patria. Dreths e obligaziuns ein fixai els artechel 33 tochen 36. Gl'emprem definescha generalmein loghens da scavaziuns. Il secund determinescha che scadina ei suttamesa alla survigilanza dil cantun. Duster ni disturbar scavaziuns archeologicas ei buca da cussegljar. Tgi che fa quei cunterfa agl artechel 34 alineia 1 che reglescha la responsabladad e las consequenzas. Artechel 35 determinescha che possessurs da parcelas cun scavaziuns archeologicas ein obligai da tolerar e lubir quellas. Il cantun sa era decretar mesiras da proteger il liug dall'anflada. Ed artechel 36 definescha che anfladas da valor scientifica considerabla seigien en possess dil cantun. Tgi che fettschi scuviertas, hagi d'annunziar quellas immediatamein al Survetsch archeologic cantunale. Il post cantunale seigi obligau d'examinar, inventarisar, gest tenor basegns pinar, conservar e deponer ils objects professionalmein.

L'ordinaziun cantunala da quella lescha tracta scavaziuns archeologicas en in stuet artechel 16. Alineia 1 definescha che gl'uffeci competent sa lubir scavaziuns tras tiazas persunas, sche quellas san garantir in'organisaziun professiunala. Alineia 2 definescha ch'ei drova ina lubientscha cantunala da duvrar detecturs da metal per encurir en loghens nua ch'ìns suppona ch'ei hagi objects archeologics. (fmr/abc)



La fossa ch'ìl Survetsch archeologic dil Grischun ha documentau dacuort.

FOTO ADIGR

SURSELVA

Palorma per s.Giusep

Ìls 19 da mars ei per ils Giuseps e las Giuseppas in di special – silmeins per ils Giuseps e las Giuseppas e Giuseppinas che festiveschan quei di lur patrùn. Uss ei l'uniun da Giuseps denton vegnida sliigada. Ina davosa gada ein els aunc s'entupai il mardis vargau – per far printgas e surdar la facultad dall'Uniun a s. Giusep.

RTR/FMR

Igl ei stau la davosa gada ch'ìls commembers dall'uniun da Giuseps da Tujetsch ein s'entupai per festivar lur patrùn. Restai ein da varga 100 commembers els onns 1980 aunc 5. Buca tuts han denton saviu vegnir alla radunonza generala dall'uniun il mardis vargau, sco Alfons Giusep Demund declara: «Ei füss aunc in pèr Giuseps d'entuorn, forsa aunc circa 15, aber daplirs era buc pli. Numdadiu, quei ston ins prender sco igl ei.»

L'uniun quenta buca pli cun ina gronda carschen da Giuseps e Giuseppas ils proxims onns. «Oz dattani buc pli num Giusep ni Giuseppa als nievnaschi», di Giusep Alig, di dils confundaturs dall'uniun. «Nus eran tons, ed ussa essan nus aschi paucs. Biars vevan era num Paul Giusep e Gion Giusep e Giuseppas, mo ils biars ein morts.»

In num popular en Tujetsch

En Tujetsch ei in uniun da Giuseppas a Giuseps seformada il 1987. Quella dumbrava all'entschatta rodund 100 commembras e commembers. Els hagian mingamai fatg ina messa il di da sogn Giusep a Bugnei ella caplutta dedicata al sogn. Lura hagian els fatg la radunonza. «e suenter ha scapescha era in bien gentar buca astgau muncar», declara Alfons Giusep Demund (90).

El ha surpriv avon paucs onns il presidi ed ils documents da l'uniun, perquei ch'ìns ha buca pli anflau persunas che vulevan surprendre quellas incumbensas. Ed ussa seigien els propri vegni alla conclusiun da sliigiar l'uniun e da guder aunc il gentar da ventschida, di Alfons Giusep Demund. La facultad dall'Uniun han els surdau a lur numalin, s. Giusep.

S. Giusep ella bibla

Sco bab nutrider da Jesus e part da la famiglia sontga ha sogn Giusep ina rolla speciala denter ils sogns ella baselgia catolica. El Grischun han 12 baselgias sogn Giusep sco patrùn. Certas vischnauncas catolicas dalla Cadi festiveschan il sogn cun in survetsch divin.



Ìls davos Giuseps ch'ei vegni al gentar da cumiau el buffet dalla staziun da Sedrun. Alfons Giusep Demund, Giusep Alig, Giusep Giger, Giusep Mudest Venzin e Giusep Monn (da sen.).

FOTOFIR

ILANZ/GLION

La «Tegia dil starler» vegn affittada

La vischnaunca Ilanz/Glion affittescha naven digl 1. da fenadur 2024 la «Tegia dil starler» sin l'Alp Ligneida ch'ei sil territori da Luven.

La «Tegia dil starler» sesanfla sin in'altezia da 1370 m s. m. sin la spunda orientala dil Pèz Mundaun. Naven da baul la stad entochen gl'atun porscha il territori biaras pusseivladads per far turas da viandar. Denter il matg ed il settember vegn l'alp cargada cun vaccas-mumma. Ed igl unviern contonsch'ins la «Tegia dil starler» cun calzers da neiv naven digl anteriur intscheg da skis da Sasolas. Tenor la publicaziun sin la pagina d'internet www.ilanz/glion.ch vul La vischnaunca Ilanz/Glion affitar la «Tegia dil starler» per tschuns onns. La tegia ei vegnida renovada la davosa gada igl onn 1991. Igl edifeci dispo- na da forz'electric ed aua ed ei colligiau cun la canalisaziun. Sco quei che la vischnaunca scriva munti il spazi da habitar a cerca 20 meters quadrats. Il local vegni scaldau cun forz'electric. Prioritad hagian ils interessents dalla frazzion da Luven. En secunda prioritad vegni la populaziun dalla vischnaunca Ilanz/Glion risguardada. (cdm/fmr)